

6-кейс. ФРАНЦИЯДАГИ ТЕРРОРЧИЛИК ҲАРАКАТЛАРИНИНГ ҚУРБОНЛАРИ ОММАВИЙ АХБОРОТ ВОСИТАЛАРИГА ҚАРШИ ЧИҚИШДИ

2015 йили Францияни қатор террорчилик ҳаракатлари ўз гирдобига тортиб, ўнлаб тинч аҳолининг ҳаётига зомин бўлди. Террорчилар 2015 йил 7 январда Charlie Hebdo сатирик журнаlining таҳририяига ҳужум қилишдан бошлашди. Қуролланган ака-ука террорчилар таҳририят биносига бостириб кириб, ўт очишган. Оқибатда 12 нафар киши ҳалок бўлган. Шунингдек, ўша йилнинг 9 январь куни мазкур террорчилар Париж яқинидаги Даммартен-ан-Гоэл шаҳарчасидаги босмахонага бостириб кириб, ходимларни гаровга олишгач, кутқарув операцияси давомида полициячилар томонидан ўлдирилган. Гаровга олинганлардан бири, босмахона ходими мазкур террорчилик ҳаракатини ёритган France 2 ва TF1 телеканалларини ҳамда RMC радиостанциясини судга берган. Ходим ўз давосида террорчилар босмахонага бостириб киришганида у қўл ювишга мўлжалланган раковина тагидаги шкаф ичига яшириниб, у ерда 8 соат жон сақлаганини, аммо телеканал ва радиостанция журналистлари жонли эфирда босмахонада яна бир ходим борлигини айтиб, террорчиларни *“бу ҳақда огоҳлантириб, унинг ҳаётини хавф остида қолдирганликларини”* айтади. Шунингдек, 2015 йилнинг апрель ойида Франциянинг олти нафар фуқароси BFM-TV телеканалини, *“террорчиларга ёрдам берганликда айблаб”* судга беришади. Маълум бўлишича, 2015 йилнинг январь ойида улар террорчи томонидан Париждаги Nuper Cacher дўконида гаровга олинган. Телеканал журналисти воқеа жойидан олиб борилган жонли эфирда *“дўконнинг музлаткичида террорчидан яшириниб бир гуруҳ одамлар, шу жумладан икки нафар бола ҳам жон сақлаётганини”* айтган ва шу орқали уларнинг ҳаётини хавф остига қўйган. Собиқ гаровдагилар телеканални *“инсонларнинг ҳаётини хавф остига қўйиш ва ва онгли равишда хавфсизлик қоидаларини бузиш”*да айблашган. Мазкур воқеа жараёнида теле-

ва радиожурналистлар инсон ҳуқуқлари билан боғлиқ қуйидаги халқаро қонунчилик меъёрларини бузишган. Хусусан,

1. Инсон ҳуқуқлари умумжаҳон декларациясининг (Бирлашган Миллатлар Ташкилоти Бош Ассамблеясининг Резолюция 217 А (III) билан 1948 йил 10 декабрда қабул ва эълон қилинган) 3-моддасида “Ҳар бир инсон яшаш, эркин бўлиш ва шахсий дахлсизлик ҳуқуқларига эгадир”, дейилади.

2. “Фуқаролик ва сиёсий ҳуқуқлар тўғрисида”ги халқаро Пактнинг (Бирлашган Миллатлар Ташкилоти Бош Ассамблеясининг 1966 йил 16 декабрдаги 2200 А (XXI)-сонли резолюцияси билан қабул қилинган, 1976 йил 23 мартда кучга кирган) 6-моддасида “Яшаш ҳуқуқи ҳар бир инсоннинг ажралмас ҳуқуқидир. Бу ҳуқуқ қонун билан ҳимояланади. Ҳеч ким ўзбошимчалик билан инсонни яшашдан маҳрум қила олмайди”, дея қайд қилинган.

3. “Гаровга олинишга қарши кураш тўғрисида”ги халқаро Конвенция (Бирлашган Миллатлар Ташкилоти Бош Ассамблеяси томонидан 1979 йил 17 декабрда қабул қилинган) 1-моддасида “Ҳар қандай шахс, а) гаровга олиш ҳаракатини амалга оширишга интилка ёки б) гаровга олиш ҳаракатини амалга оширишга интилаётган ҳар қандай шахсга шерик сифатида қатнашса мазкур Конвенция мақсадлари учун жиноят содир этган ҳисобланади”, дейилади.

Тавсиялар.

Террорчилик ҳаракатларини ёритиш медиа ва журналистлар учун ўзига хос синовдир. Чунки мудҳиш воқеа содир бўлгач, ОАВ бир бирига қарама- қарши бўлган, ижтимоий тармоқлар, расмий манбалардан келиб тушаётган маълумотлар ичида кўмилиб кетиши ҳеч гап эмас. ОАВнинг террорчилик ҳаракатини шошилиш билан ёритиши террорчилар учун қўл келади ва

аудиторияда саросимагарчилик, кўркувнинг кучайишига олиб келади. Бунинг олдини олиш учун турли мамлакатлар хавфсизлик чораларини кўришади. Масалан, Туркия ҳукумати 2016 йил 17 февраль куни Анқарада содир этилган ва 28 нафар инсон ҳаётига зомин бўлиб, 60 одамни жароҳатлаган террорчилик ҳаракатини ёритишни оммавий ахборот воситаларга таққлади. Mediakritika.by сайти террорчилик хуружлари ва уларнинг оқибатларини ёритиш юзасидан медиага берилган турли тавсияларни таҳлил қилиб, улар орасидан энг кўп учрайдиганларини жамлади:

-ОАВ ва журналистларга ОАВ тўғрисидаги ҳамда терроризмга қарши кураш тўғрисидаги амалдаги миллий қонунчиликка қатъий риоя этиш тавсия қилинади;

-ОАВ ўзининг ҳаммабоп эканини, ўша “ҳамма”нинг ичида террорчилар ҳам борлигини унутмаслиги керак. Уларнинг ОАВдаги хабарга муносабати қандай бўлишини олдиндан билиб бўлмайди;

-террорчиликка қарши амалиётларни батафсил ёритишдан қочиш керак;

-инсонларнинг ҳаётини сақлаб қолиш жамиятнинг ахборот олиш ҳуқуқидан кўра муҳимроқ эканини ҳар доим ёдда тутиш зарур. Бундай ҳолларда хавфсизлик нуқтаи назаридан ахборотнинг маълум қисми очиқланмаслигини ошкора айтиш лозим;

-ўзининг вазифаси аҳоли орасида ваҳима ва саросима уйғотиш эмас, балки жамоатчиликка ахборот етказиш эканини унутмаслик керак. Шу боис журналист айтаётган, ёзаётган гапининг нафақат мазмунига, балки оҳангига ҳам эътиборли бўлиши лозим;

-воқеани ёритиш жараёнида инсонлар ҳаётини сақлаб қолиш учун масъул бўлган ҳуқуқ-тартибот идоралари, тиббиёт ходимлари ва шу каби бошқа идораларнинг ишига ҳалақит бермаслиги керак;

-гаровда одамларни ушлаб турган террорчиларни қасддан ҳақорат қилмаслик ва камситмаслик керак. Бу нарса гаровдагиларнинг ҳаётини хавфга қўйиши мумкин;

-шафқатсизлик ва ваҳшийлик сахналарини ёритишда ортиқча шов-шув ва табиийлик ортидан қувмаслиги, ўз аудиториясининг ахлоқий ва диний қарашларини ҳурмат қилиши зарур;

-тахликали вазиятда ўз зиммасига воситачи вазифасини олмаслиги керак.